

September 2021
VOLUME III | NO. 2



Siamsin Journal

a paité students' monthly

Khaile! Lawm aw, Masuan Ni

EDITORIAL BOARD	CONTENTS
<u>Editor:</u> Alex Siamgouthang Guite	EDITORIAL 03
<u>Associate Editors:</u> Chinmuanthang Guite Minlun C. Lunkim Vunghoihmawi	LAIGELH PAIDAN: LAI GELHDAN TANGPI 04
<u>Contributing Editors:</u> M. Paumuansang Vungthianmuang Lunminthang Samte	GENERAL ARTICLES: LIANDOU & THANGHOU 06 GAM POLITICS TAKTAK CHIVU 08 SIAMSINTE KIANGA LAIKHAK—1 10 TALIBAN 13
<u>Production Manager:</u> K. Tualsangthang Thangsangkham Vualzong	SSPP ACTIVITIES: SRDC IN SINLAITE SPONSORSHIP PIA 16 SELAM UNIT O.B. THAK TE 17 GHQ IN C.M. AH MEMORANDUM PIA 18 SMC (SSPP-RS) 2021-2023 LIST 18 SIAMSIN JOURNAL VOL3.NO.1 HONNA NEI 19
<u>Circulation Manager:</u> T. Thangboi	
<u>Cover Design:</u> George Thangmuansang	
<u>Thusuah Ding Piakna:</u> Editor SIAMSIN JOURNAL SSPP Complex, Siloam Veng Bungmal, Lamka, CCpur <u>Manipur, PIN 795006</u>	HEALTH COLUMN: VIRUS SHUT OUT @ COVID—19 20
Mobile no.: <u>9612523135 9366787769</u>	KIPAHPHNA: NGEMBIAKSANG 22
Email: <u>ssppghq@gmail.com</u>	LIANGOUTAN VALTE 22
<u>THUSUAHTU IN AMAH THUSUAH AH MOHPAW DING AHI</u>	ANGELA CHINGNEIHOIH 22
<u>LAKMAN</u> Bukhat : ₹30.00 Kumkhat : ₹350.00 Dak ah : ₹400.00	GINDEHKIM 22 CIIN MUAN KIM 22 CHINGTHIANLUN 23 VIDLUNMANG GUITE 23 LALMUANA GUITE 23

Editorial.....

Amasa in **Kaukha** (September) honpi I biak Pathian tung ah kipahthu ka gen kawm in 'SIAMSIN CHIBAI'.

I Journal Vol 3 issue 1 a panla leh Article hon contribute te tung ah kipahthu kagen kawm in maban ah leng siamsinna lampi tanvak saktu hihtheih na dia I literature uh tungtawn a I pau mahmah pibawl a SI-AMSINPAWLPI itna ziak a laigelh hahbawl zaw sem a, laibu tamsem sunkhia a, I khangthak te a dia GOU hid- ing in heutute leh ka Siamsin pihte kon hanthawn masa hi.

I Pawlpi in Kuhkaltak a Siamsinna a ngaihkhawk mahmah lai in, bang hang a ei PAITE NAM te Solkal naa lam, a bik in Civil Services lam a hici kiakniam i hia chih ngaihsut tham kasa hi. Tua ahihna ah Fact Finding Team bawl a, a ziak bang hi hiam

chih sut deih huai mahmah sak in om hi.

I Journal in a tup, Siamsin te a ding a ladder hoih a hong hih a, Siamsinpawlpi mirror a hong hih deihna in, Vol 3 No 2 suahnawn thei a I om man in kipahthu I gen hi.

Maban ah leng Siamsinpawlpi panlak na in, tup leh ngim tamtak bohzui leh suah hong hi zelzel ding a, kuapeuh mah in SIAMSINNA mah Khapeet zen a pang in pibawl ni.

S I A M S I N P A W L P I
DAMSAWT HENLA, MA-
SAWN ZEL HEN.

*Sd/- Editor,
Alex Siamgouthang Guite.*

Lai Gelhdan Tangpi

Dr. Tualchin Neihsial ©PLS, Chapellane, Hiantam Lamka

-(sutzopna)-

(ii) Superlative ‘pen’ leh ‘bel’ adjective toh gelhmat diing ahi.

- ◆ Nungaak mel hoihpen kiteelkhia hi.
- ◆ Asiambel ahong damask theipa Jesu ahi.
- ◆ Hoihpen, lianpen, golpen ngengpen.
- ◆ Siampen, asiangbel, ahoihbel.

**(iii) Demonstrative adjective
‘pen’ leh ‘bel’ kizangkhawm thei a,
‘pen’ leh ‘pen’ zong kizangkhawm
thei napi, ‘bel’ leh ‘bel’ kitam zat-
khawm lou hi.**

Etsakna:

- ◆ Amah pen bel ahattakpi mah hi.
- ◆ Nang penpen n'ong pai keileh hithei lou hi.

**(iv) Tehpihna [comparative] leh
Tehpih bei [superlative adjective]
anuai a bang in:**

Baihzaw	- baihpen
Cinghzaw	- cinghpen
Damzaw	- dampen
Golzaw	- golpen
Hauzaw	- haupen
Hatzaw	- hatpen
Hoihzaw	- hoihpen
Itzaw(zawk)	- itpen
Kinzaw	- kinpen
Lianzaw	- lianpen
Naizaw	- naipen
Pheizaw	- pheipen

Sangzaw	- sangpen
Siamzaw	- siampen
Sukzaw	- sukpen
Theizaw	- theipen

**(v) Ei pau a ‘toh’ kichi English
Grammar a ‘with’ toh kibang a
lehkhiak teitei sawmna ziak in mun
tampi ah ‘toh’ kizangkhial hi.**

* “*Siikkeu toh an ka ne*” cih louh a
“*Siikkeu in an ka ne*” cih diing ahi.

* “*Suang toh bawng ka deeng*” ci
lou in “*Suang in bawng ka deeng*”
cih dikaw hi.

**“*Tui toh mei ka buak*” i cih ciang
in diklou a “*Tui in mei ka buak*” i
cih ciang in adik ahi hi.

[Ciamteh diing]:

- (a) Consonant ‘H’ pen glottal stop
ahih dungzui in, H a tawp peuh-
mhah asaugin thei mawngmawng kei. **Bawh,**

Laigelh paidan: Lai gelhdan tangpi

Dawh, Gawk, Kawh, Mawh, Nawh, Sawh, Tawh, Zawh ciin gelh mahle hang a saugin thei kei. Gelhdan chii nih zat sang in khat zat hoihzaw ahihman in

Boh, Doh, Goh, Koh, Noh, Poh, Soh, Toh, Zoh ci a gelhzawk diing ahi.

- (b) Numei' min leh pasal' min khenkaakna ding in zong '**H'** behlap in kizang thei hi:

* Vungkhanlian kici min pen numei maw, pasal?

* Vungthawn kici min pen numei maw, pasal?

Vung [numei' min];
Vungh [pasal' min]

- ◆ Vungkhanlian ci a I gelh ciang in numei hi a, Vunghkhanlian ci a I gelh ciang in pasal ahi hi.
- ◆ Langlamkim kici min pen numei maw pasal?

Lang [numei' min]; Langh [pasal' min]

Tua mah bang in,
sungte [Innkuante] ; leh **sunghte** [in-laws] in khenkaak hi.

13. ABSTRACT NOUN:

Adjective, verb leh **noun** khenhat apan **abstract noun** hong kibawlkiakna kammal -

dan, zia, leh **na** cihte hong pian-na kammalte toh hal lou a gelh mat diing ahi.

Dong -	dotna	dotdan	dotzia
Kap -	kahna	kahdan	kahzia
Pai -	paina	paidan	paizia
Hoih -	hoihna	hoihdan	hoihzia
San -	sanna	sandan	sanzia
Lui -	luina	luidan	luizia

Abstract noun ahihlam mangngilhkha in apianna thumal leh – **dan/zia** kal ah diing kizangkha pahpah hi.

Etsakna: **Na dotdan diing** cih sik-le-taang in **Na dot diingdan**. Anih tuak in sentence dik ahi ua, himahleh age nut leh kawk tuam ahihman in pilvaanhui mahmah hi.

14. PLURALITY:

Tulai in **English Grammar** a plural bawlna a 's' toh kibang a 'te' chih kohi teitei sawmna ziak in mun tampi ah kizangkhial hi. 'Te' cih pen '**plural marker/collective marker**' bel ahi peuhmah a, himahleh l pau uah **plural form** pen **noun** kia a kipan kibawl lou in, **parts of speech** [**Pau Sehkhen**] a kipan tuamtuan **adjective, verb** leh **adverb** a kipan leh **pronominal elements** khawng a kipan in zong plural hihna kibawl hi.

- (sutzop ding) -

General Article:

Paite Folktale

LIANDOU LEH THANGHOU

*Limchiin dia gelh: Lalthanglun Guite, Imphal***LIMCHIIN KHATNA:**

Chimnuai Geltui khua athupi mahmah lai in, Khampat, Lal in Chimnuai Geltui hausa kiang ah palai sawl in, a Ialgam, Shan, Lal in vasim ahihdan leh hutkhiak ngai ahihman a panpihna pe ding in chial hi. Huchi in Geltui hausa in mihangsan leh galhat mi 45 sawl in va kuan ua, Shan khut a pan va hunkhia uhi. Huaite lak a tel mihangsan leh galhat mahmah Sinthang, galmun a liamsa in inn hong tung a, ni tam lou thuak in azi ittak Ngendong leh atate nih Liandou leh Thanghou nusia in aleitung hinna bei hi. Ni 8 vel si-aihna neih ahih zoh in luang vuina hun zat in om hi.

Ngendong:

Aw maizen! Hon paisan petmah ding na hi maw, ka phalkei, ka phalkei.

Ka pasal Sinthang, kei a ding in ka pa bangbang ahi a, akhen chiang in ka lawm bangbang ahi a, amah tel lou in bang ka chita dia!.....

Galdou a kuan ahong tun in bangmah gen lou in om a, himahleh, zan ahong hih in i m zou nawn lou, na sa lo mahmah ahihman in aliamna hon lak a, hihdan ding tuan thei lou in amah ka kawi zel a lah anatna adai tuankei. Agil a si pawt lah khawl lou ahihman in kho siamu ka sam a, huchih sung in tanau laina leh

amah ittu mi tampi hong tung ua. lou leh kithoihna chiteng Siampu in hih mahleh, ahinna humbit zou lou ding chih akitheih in awl in hong paukhia a.....I tate Thanghou I e h Liandou zaw hon gentheisak mahmah ke'n aw, chi in khituinaptui toh akhut hon van a, ke'n leng amah lak ah, bang teng hong tung mahleh i tate ka taisan kei ding, ka gentheih ualeh ka gentheikhawm ding ua, ka hauh uleh ka haukhawm ding ua, i tate ka tulpih ding chi in hanlung ka chiam hi. Tua thu azak khin phet in, nuih meltak leh kipah meltak kawm in hon beisan hi.....(Kap)

Hausa:

Liandou nu, Ngendong aw, kap

General Article: Liandou leh Thanghou

nawn ke'n. Mihangsan leh galhang Sinthang kha in h o n awi lou ding ahi. Na khitui nulhul inla, na pasal hangsanna gum in thugen in.....

Bang tanhiam paita in Shan, Lal in Khampat, Lal ava sim ziak in, Khampat panpih ding in i khua mihangsan leh mihat 45 kisawl hi. Tuni a i suntak uh Pu Sinthang toh sim in mi 4 in sihna ava tuah ziak un, i khua paidan dungzui in nau apian peuhmah chiang achiamtehna bawmpu sung a linggap, apiang zahzah kithun zel in, sihna tuak a-omleh asi zah mah lakkhaik ahi zel hi. Huaiziak in Pu Sinthang leng i suunna bang ni giat chingta ahihman in bawmpu lian sung a pat amah toh simtel in mi 4 lakkhaik ahita chih ka puang hi.

Mihangsan i sawlte panpihna ziak in Khampat Lal hutkhiak in om mahleh ei mihangsante lak ah tuni a i suun Liandou pa, Pu Sinthang in liamna tuak in sihna tan hon tun hi. Gen ding ka thei kei, ka suun mahmah mai a, kei kia hi lou in i kho pumpi'n i suun a, amah zahna pia in i dih vek ding uh. (*Mipi dih vek uh*).

Mihangsan leh galhang Pu Sinthang in anutsiat azi, Ngendong in atate uh Liandou leh Thanghou etkolna leh khosakna dawnzang ahihtheihna ding un atate piching ahih ma tan uh buhsun leh saliang sunte awlsak ahi ding uh chih kei Chimnuai Geltui kho Hausa in ka puang hi.

(Zan lup ding kuan in)

Ngendong:

Bawite, haii lam ah hong kikhin un, i kikawi ding ua, i ihmuh thilthilta ding uh aw. Noute mel ka muh chiang in papa mu bang in ka kingai a, nuam ka sa lua, hon naih un, bawite.

Liandou:

Nu, ke'n leng k'on ngai lua, ka hon naih ding, nu. Ka hon kawi kip tinten ding aw, Nu.

Thanghou:

Nu, ka u'n hon neh lua, nu ka u'n hon neh lua.

Ngendong:

Bawi, na kikhin gamla deuh ve, na nau anaksam kha ding. Na nau kha hehpih mahmah in aw, na nau leh nang chih louh ke'n lamet leh kinepna nei lou ka hi aw, bawi. (*Sutzop ding*)

General Article:

GAM POLITICS TAKTAK CHIVU

PUBLISHED BY MEDIA & PUBLICITY, RESEARCH AND PRESERVATION OF THE ZO IDENTITIES (RPZI)

BANG A CHIVU?

Chivu i chih Indo-Myanmar border a om Tuivai lui kiang a om Tonjang khua a chi tui leh dil omna mun ahi. Lamka khopi akipan simlam (south) zuan in kilometer 58 vel a gamla ahi a, Behiang akipan nai chik ahi. Gari ah dakkal khat leh kim vel kitai ahi. Nidang lai in i pipute'n hiai mun ah chi tui ana huan sek ua, chi tui phuan a paihte uh a vu vuum menmon sek hi. Huai ziakin hiai mun CHIVU ana chi uh hi.

PUPA GOU MANPHA CHIVU.

Tulai dan a chi baihlam tak a kimu lou ahih manin nidang in khua tuamtuan akipan hong paikhawm ua, Chivu mun ah leibel in chi huan zel uh hi. Chi a huan ua kipan chi pek lum (circular salt slab) bawl zel uh hi. Hiai chi tui quality hoih mahmah a, gawl bawk le om lou a theih ahi. Chivu dil a etlawmna leh chi tui a om ziakin a gam enlah tam mahmah hi.

CHIVU LEH MEITEITE KISAIKHAK NA.

1871 kum bul lakin Lushai te'n ka sabetna mun uah lou nong bawl uh chi in Cachar gam Alexandra kichi mun a Tea Plantation bawl British nupa khat that ua, a tanu uh kum 6 mi Mary Winchester (Zoluti) leh British mi bangzah hiam man uh hi. Lushaite dou ding, thuhilh ding leh mat a om British mite hun khe dingin

The Lushai Expedition chih December 1871 in hon pankhia uh hi. British sepaih column nih General Brownlow makaih in Chittagong column leh General Broughier makaih in Cachar column bawlkiak hi uh hi.

Cachar columnte'n Lushaite va nawk ding uh ahih chiang un, Kamhau te'n Lushaite a panpih ding uh venna kawm leh Lushaite Kamhau gam lam a kibuk ding uh veng dingin, British Manipur Political Agent General James Nuthall panpih dingin Meitei lengpa in Meitei major nih toh sepaih 500 sawl hi (*Page 48 of The Lushai Expedition by Robert Woodthorpe*). Hiai Manipur contingent te Chivu mun ah va ki camp uh hi.

Champhai lam a kuan Cachar column te'n Lushai hausate va zou ngei ua, Mary tel in British mi mat a omte

General Article: Gam politics taktak chivu

va hun khia uh hi. Chivu mun a bangmah buaina omlou in Lushai Expedition bei toh kiton in General Nuthall makaih in 6 March 1872 in kik uh hi. Himahleh Meitei majorte gel Thangal leh Balaram te bel thu zak a neih ziak un hong nituang uh hi.

Huchi in Meitei te'n Chivu mun a akalsuanna uh theih gigena in suang phuh bawl uh hi. Meitei lengpa Chandrakirti khekhap leng bawl uh hi. Meitei lengpa Chandrakirti suang pen ah Manipur emblem a sa lim pen gelh ua, Lushai hausa 4 zou a khua 112 la uh ahih dan gelh uh hi. Suang khat pen ah General Nuthall ui lem toh a khekhap bawl ua, suang thumna pen ah mi nih lem Meitei major tegel lem hi dia gingtat bawl uh hi. Khonung in Meitei pathian Thangjing leh a zi lem chi uh hi.

1894 in British mi Mr. Carey leh Mr. Porteus, huai hun a Political agent of Manipur in hiae Chivu suangte va enkhia ua, hichi in comment uh hi “*It will be noticed that the Manipuris claimed to have done more conquering than our records credit them with*” (Page 123 of *The Chin Hills by Bertram Carey & H.N. Tuck*). Manipuri te'n a sepkhiat zah uh kou chiamtehna sang a tamzaw tham opkhum/sim

dan a akipuan uh, theih khiat hong hi ding hi chi in gen uh hi.

UKPIPA GOUKHOTHANG MATNA:

Ni dang in Meitei leng Nur Singh hun lai (1834-1850) akipat in Kamhau (Sukte) te'n Meitei gam ana luh gige sek uh hi. Chandrakirti in Manipur leng hihna a let zoh sawt lou 1856 kum in Meitei phaizang Sukte te'n va luh nawn uh hi. Chandrakirti heh lua in January 1857 in Suktete dou ding in sepaiah 1500 sawl a, amah ngei leng va kuan hi. Himahleh nasatak in va vuallel a, a sepaichte taizak ua, a lengpa uh taisan uh hi. Sepaiah 20 toh Chandrakirti a gam phaizang tungkik chih ahi. Huai nung in Sukte te'n British Colonel McCulloch, huai hun a Political Agent kiang ah Meiteite dou nawn lou ding ahih dan uh thu ana pia uh hi. Meitei te'n Kamhaute, Sukte dou di ana ut gige ua, amau kia a lah ngam lou ahih chiang un Britishte ana zol gige ua, himahleh zol zou ngei lou uh hi.

Lushai Expedition lohchingtak a zoh ahih toh kiton in Chivu mun a om General Nuthall makaih a omte leng 6 March 1872 in kik uh hi. Quite hausia Goukhothang mi 957 vel toh hong pai ding chih thu a zak ziak un Meitei major tegel leh sepaiah bangzah hiam nituang uh hi. (Sutzop ding)

General Article:

SIAMSINTE KIANG A LAIKHAK-1

David Neihguk ^a, Dr. Pau Biak Sang ^b

*“Two roads diverged in a wood, and I—
I took the one less traveled by,
And that has made all the difference.”*
– Robert Frost

THUMAPI:

Class X pass dangka cheng 10 toh tehtheih hi. Tanglai a, I Pu-Pa te hunlai toh teh in dangka (currency) (etsaknadin, cheng 10) a manphat dan kiamta mah leh sum ahihziak in a poimoh dan kiam tuanlou hi. Cheng 10 neih man a hausak ding chihna hipahlou in, a zatdan i siamleh hausak pih thei hi. Siamsinten', I cheng 10 uh bang chin' zat I sawm ua leh?

Laphuaktu in “*Khen tuam a nei lo, Pa nong itna lian lua; Dei dan tuan nei lo, kei a ding na ngawn ki ching*” achih mahbangin siamsinna in deidan neilou a, siamsin ut khempeuh ading in hunlem (opportunity) kichingtak om hi. Si amna leh pilnate sum-leh-pai a leitheih hilou a, kideihsak thu a kipiak theih leng ahisam kei hi. Huaiziakin, mipil-milian khat suah theih nading in sum leh pai lamtam (neih-leh-lam) sang in siamsin utna lungsim mah poimoh masa zaw hi. Pilna tuh nun takna ahi a, siamsinna tuh gualtoh

tanbang kimna ahi. Gualtoh tanbang kim utlou kua i om dia maw?

Tukum Class X leh XII exam a bei toh kiton in, maban ah bang ziltouh ding hiam chih tampitak buaina leh ngaihtuahna hiding in a gintak huai hi. Huaiziakin, kuahiam khat in I phattuampih ngei uh lametnatoh anuaia thu thumte saulou enkhawm ni:

1. Thupukna (decision): Class X zoh chia bang la ding?
2. Laisim dingdan tangpi leh
3. Lohching ngeingei dia panlak dingdan

1. **Thupukna (decision): Class X zoh chia bang la ding?** Class X zoh chiangin lampi ka bul a om toh kibang hi. Atangpi in, telding lampi thum om a, huaite ahihleh Arts, Commerce leh Science ahi. Hiai teng thum lak a koipen lak ding hiam chih a lungbuai tami ki om hi. I theih ding ua poimoh ahihleh a hoihzaw tuam chih a om

General Article: siamsinte kiang a laikhak—1

kei a, mahni lunglutna leh tempaina lam lak mah ahoih zaw hi. Kuate hiam in hoih a chih man ahih keileh lawm leh vual ten a lak man ua theichiang lou pi a thupukna lak louh ding ahi.

Siamsin tampiten Science ah career option tamzaw chihmanin Science la ua, a haksat leh Commerce/Arts a kituankik theih thou chih ngaihdan chiangkuanglou nei uhi. Ahihhangin, theih dia poimoh mahmah khat ahih leh Class X toh Class XI a sinlaite kikkhoukhat mahmah a, Class X subject haksa sa khollou ten le Class XI a hon zil chiang un haksa sa mahmah uh a, Class X ana nuamlua ahih lam khawnung phawk uh hi.

Huaiziak in Science lak na sawm leh kingaihtuah detdet inla, a khonung a haksa sak ziak a stream dang a kituan mai ding khong ngaihsun nahih leh lak selouh hoihzaw kha ding hi. Huchi hilou a, Science lam a lunglut tinten nahih a, maban a na tup-leh -ngimte tangtun nadia Science poimoh ahih leh bel chihtakna toh na lak teitei kul ding hi.

Siamsinten' hiae hun poimohtak a thupukna I lak te ei khang kia hilou in khangsawnte tanpha sukha thei

thil ahi. Thupukna lak khialh louh na dingin chiangtak a kingaihtuah ngai hi. Huai ahih theihna dingin Science lak ding leh lakkloou ding toh kisai ah mahni ki-et-telna (self examination) poimoh mahmah hi.

1.1 Science la taktak di ka diam?

Science lak ding leh lakkloou ding kikal saikakna a hon lamkak ding leh thupukna taktak lak theihna dia hon panpihtu dingin anuai a point te kahon luikhia uhi :

- 1) Maban ah MBBS, Nurse (GNM chih louh), Engineer, Scientist, Architech, Army, Airforce, Navy, Pilot, Information Technology (IT), Computer programmer leh adangte khong a pang nuam nahih leh bel Science na lak teitei kul ding hi. Huchi hilou a IAS, Bank PO, Chartered Accountant, MBA, Designer, Musician, Sports person, Chef leh adang adangte khong a ut na hih lehbel Science lak teitei ngailou ding hi.
- 2) Thil theihut hau (curious) mahmah khat nahih a, thil tuamtum am theinuam, dotna tuamtum bawlbaawl, thil a kibawl dan theinuam, thil bawlkhe nuam mi khat nahih leh Science lungpu nahi.
- 3) Science lungpu chih bangchi

General Article: siamsinte kiang a laikhak—1

- kitheih ding?
- Na neulai a tape-record khong ana phel,
 - Mobile sung munuam a phel sia,
 - Sana (watch) khong a sung munuam a phel sia,
 - JCB, lenna, rocket chihte khong thupisa a lem khong bawl,
 - Computer lam lunglut (game kimol kia lunglut hilou, a games te bangchi dan a kibawl, computer sung a bang om), chih khong thei ut,
 - Hiae a tung a ten' na hihna hon genkha hi a natheih leh Science lungpu nahi.
- Pianken a lungsim hat adiak a number toh kisai, logical reasoning lam siam, banah Science toh kisai himhim lunglut mi nahih a, na mi ngaihsang te Albert Einstein, Issac Newton te khong ahih leh Science na lak ahoih ding hi.
 - Mahni kithununthei, khanvual polh dan siam leh niteng a hunbi nei a atawm pen a dakkal 2-3 bek lai sim thei gige mi nahih leh Science subject toh kituak mahmah ding hi. Bangziak hiam ichih leh a tung a l gensa mah bang in, a syllabus lianlua ahih man in school a niteng a zillai a ahon simsak dandan ua enle isim touh keileh a kumtawp lamchia miksi leh saipi kisual mah abang dia, a haksa mahmah ding hi.
 - Mathematics tellou a Science lak theih himahleh hiaipen theichiang tak a thupukna (*well-informed decision*) lak ding ahi. Maban a Biology subject specialization lak-sawm
- (Biologist hi hut) te leh Mathematics a lunglut lou himhim leh chauhna/bahna (weakness) nei lah Science lam lunglut tinten te adding in bel Maths lak teitei ngailou hi. Huchiloute ading in tuh Mathematics lak teitei ding ahi. Aziak ahihleh, Mathematics leh Science paikhawm mahmah ahih-man in Science lunglutte ading in Maths nawlkhin taktak theihlouh ding hi. A niampen a Class XII tan Maths bel ahunkhop a theih in maban ah phatuamna (sepna zonna lam hitaleh) tam mahmah ding hi. Maths tellou a science lak pen akisam khat om nasak hun hong om ding hi.
- Hiae a tung a kigente a tamzaw dik hi a na theih leh Science na lak ding ahi.
- (Sutzop ding)

General Article:

TALIBAN

Alettu: Valentina Khuptong, Jt. Secretary, I&PR, SSPP GHQ

Taliban kichi kua te ahi ua, bangziak a lauh a om ahi ua? Koi akipan hongpai a, bang deih ahi ua? Hiai Taliban kichi te'n khovel thuthang te honluah zou non get ua, a tangthu uh tomkim i en khawm ding uh.

Taliban kichi siamsin naupang chihna ahi! Ging in gingta kei le chin leng, hiai te min in khovel pumpi zelsuak in, lauhna chii ana theh ta leh theh lellel uhi. Taliban min kipatna ahihleh Pashto kichi apan lak ahi. Pashto ahihleh Afghanistan gamsung adia pau masa akizang leng ahi, milip 55% te zat chi in UNESCO in asui dungzui un gen uhi.

Tuni in 'Taliban' ahihleh Islam silh puannak bang in kizem a, a lauhhuai theitawp, Afghanistan gam lakkik sawm pawl chi inleng kithei hi. Tu in leng hiai pawl te'n a gamsung uah lauhna a thousak lellel uhi.

Afghanistan pen 'lalgam te hanmual' chi in minthang hi. Telsuimite'n a gen chiang un, 11 century BC akipan, gam leh gaal tuamtuan te'n hiai Afghanistan khua ana vualzoh khum sawm uhi. Mual in a kimveel a a um-bit khua himahleh, Afghanistan bel

mite mitsuan leh deih mahmah gam hi in, mi kibual ut na gam '**great game of Geo-strategic powerplay**' leng kichi leuleu hi.

Nidanglai in ah, Persia lalgam (*tua Iran kichi*) te'n Afghanistan ana opkhum sawm uhi. Alexander (*Sikandar aleng kithei*), in kidoupi na tuamtuan te ana zou in India gamgi tan phial leng naih man hi. Aman Afghanistan ana mitsuan mahmah a, hilehleng ana lohsam hi.

A hat mahmah Mauryans, a omna uh Magadh (*tua South Bihar kichi*), ten leng hiai gam ana luah tum ua, ana lohching zou tuan kei uh. Hiai thiltung pen tuni tan a thiltung leng ahi.

Taliban te Afghanistan a ahong kisaan thak pen uh ahihleh telsuimite'n ana gen sa mah bang un: '**'lalgam te hanmual'** ahihna aki lang semsem. Hiai Taliban te'n leng, Af-

General Article Taliban

ghanistan khatvei ana zou zohlouh uh ahi.

TALIBAN AH KUATE?

A polam aki thuam dan akipat et in Taliban ah kuateng tel hiam chih aki thei zoukei. Afghanistan sungah a om ua himah leh suichian tute akipan in Taliban heutute bel Afghanistan polam a om di'n agingta uhi.

Ki vaipuak dan khauh tak leh, ki gawtna sangtak te bang, Taliban heutute'n a thautawi te uh kiangah mohpuakna pekhia uhi.

Taliban heutu kipuakdan ahihleh khanggui a kipiak sawn ahi a, alian penpen Rahbari Shura kichi hi. Huchi lou in, Quetta Shura in leng kithei a, Pakistan khopi minkhat ahi. 2001 a US in Afghanistan a buluh lai a, hiae khopi Quetta kichi pen Mohammad Mullah Omar leh a kaihzatamte kisel na dia gintak ahi.

Mullah Omar nung in, Taliban heutu hihna pen Mullah Akbar Mohammad Mansour kianga piak ahi. Amah ahihleh 2006 a America te air strike neih in Pakistan ah ana si hi. Omar

ahihleh Pakistan a Karachi Hospital ah si ahi.

Tulel in ah, Taliban te ahih leh Mawlawi Haibatullah Akhundzada nai ah omlel ua, Rahbari Shura kichi a vaisai na khempeuh uhleh a sepaiah te uh Emirate kichi, amah etkol nanuai ah om vek hi.

Taliban ah Haibatullah Akhundzada dinmun ahihleh 'amir al-muminin' kichi a, a lehna ahihleh 'Commander of the Faithful' ahi. Taliban ki vaipuakna sung a alian pen dinmun len ahi. Mullah Omar in a dam lai a, Taliban a 'Chief' kichi amah minvuah dan a kilasawn ahi.

Haibatullah Akhundzada in ahihleh Rahbari Shura pen mi thum toh enkai khom hi. Amaute ahihleh: Mullah Muhammad Yaqoub (Mullah Omar ta-pa), Mullah Abdul Ghani Baradar (Taliban phut khetu laka ana pangte lak a khat) leh Sirajuddin Haqqani (tulel a Haqqani Network kichi po tu, khua tuamtuan a kizop pi na thuguk te saitu- Taliban, al-Qaeda leh Pakistan spy agency, Inter- State Intelligence) hi uhi.

General Article: Taliban

Mullah Omar tapa Muhammad Yaqoub ahihleh thuginna leh sahkhua lamah dinmun poimoh tak len hi. Sirajuddin Haqqani ahihleh kidouna (Taliban gumlou te) tuamtuam enkaitu di'n pang hi.

Rahbari Shura nuai ah makaitu tuamtuan solkar nasemte dan in om uhi. Hiae mite zang in, Taliban in amau melliap sel di'n solkar enkai uhi. Hiaiten bel, sepaihte dinmun, gamsung dinmun, siamsinna, damtheihna leh thu ki gakkawm tuamtuam moh puakna chihte kihawm uhi.

Hiae atunga teng lak ah a hat penpen ahihleh sepaih 'Military Commission' kichi ahi. Hiae in makaitu leh sepaih latte teel theihna Taliban nuai a sem di te nei uhi. Makaitu leh sepaih latte ahihleh Taliban khang gui dana a dan thum na te ahi uhi.

Abdul Ghani Baradar (Political Commission of Taliban) in February 2021 in US heutu te toh kihou khawmna aneih na uah, kilemna lai Qatar ah ana kai uhi. Hiae kilemna ziak in ah tu in America sepaih te Afghanistan apan kihemkhia uhi. Hiae kizuut kikna

bel kum 20 nung Afghanistan a aom nung ua tung ahi.

KHOVEL IN TALIBAN A THEIH PAT NA

Taliban kichi kammal ahihleh 1990s kipat in hong thangkhia hi. Taliban te ahihleh Madrassas (Islamic siamsinna) kichi Afghanistan leh Pakistan sunga kaite lak ah kipan hong piang khia hi. Khotang hoihzawk na ngim a pawl kipan khia khat ahi hi.

Khovel muh din ah a penpen dan a kivengsiam taka gam leh nam, sahkhua leh khotang vai a Afghanistan ah hong omkhia ahi. 1990s in Sharia-based law kichi zang un, amau ko-chik tak ginna thu a hon len pan uhi.

Gam leh nam vai ah lohchinna chiam teh tak masapen ding in 1994 in ana mu uhi. Hiae ahihleh Kanhadar a lak zoh ua, a dan uh a bulh khum ua kipan ahi. Kandahar ahihleh South-Central Afghanistan a om, Central Asia toh kizom ahi. Nidanglai in ah, Persia ten Kandahar ana luah khum ua, Alexander the Great inleng Chandragupta Maurya leh a tula Ashoka the Great te ma in ana luah ngei hi.

Siamsinpawpi Activities:

SIALKAL RANGE DEVELOPMENT COUNCIL(SRDC) IN CIVIL SERVICES LEH TECHNICIAN SINLAITE SPONSORSHIP PIA

Apaisa tarik August 27, 2021 in Sialkal Range Development Council (SRDC) in UPSC Civil Services Coaching pailel khat ah, NDA, X-Ray technician leh Lab-Technician sinlai teltuam, SRDC area a mite kiangah panpihna SRDC Chairman Office Chamber ah piak ahi.

Pu L. Thangmawia, Chairman SRDC in a zahtakhuai Chief Minister Pu Zoramthanga ziakin SRDC in melthak a mu a, nidanga a kihih ngei nailou zilna lama SRDC sum zattheih na di 2019 in Mizoram Solkal min in ahon bawlsak ahi, chi hi. Hiae scheme nuai ah a siamthei hilehle khosak haksa sinlai 23 kiangah panpihna piak ahih banah SRDC area huap sunga Solkal school a sinsaktu kidaihlounha ah SRDC in Sinsaktu kumteng a a goihsak zomah hi. Aizawl Luangmuah ah SRDC area a Sinlaite a ding 2 crores lut ding Hostel bawl ahihthu a gen banah Chairman in hiaite ziak a Sin-

laite leh Sinlai Nu-le-Pate'n kipahdan a theih uh a poimoh a sakthu gen hi. Sinlaiten a hamphat dan uh thei a, Khotang leh gam a dia zattak hiding a sin ding hasuan bawk hi. Hiae hun ah SRDC Chairman in Tv. Pau-khanmunga, Primary School a kailai a electric in amat ziak a akhut langnih tanloh, sungkuan haksatak hi bawk, huci kawm a BA pass khia in, MA bang sunzom thei ahihna ah SRDC in sinlaite a dia Ambassador ding a sehkhiak ahihthu puang in, amah a pan in khut le khe bukim a deih dandan a zangthei te kiang ah challenges nasatak ahi chi in hasuan hi.



Siamsinpawlpi Activities:

Hiae hun ah Pu Ngulzathuama, Development Officer SRDC in programme zatna hun makaih a, sinlai sponsor tu te min taklang in, UPSC Civil Service Coaching, ALS New Delhi a kailel Neihhlupui Rs 1,00,000 a sponsor ahihthu taklang a, 2019 kum a Mizoram apan NDA interview ding a ching omsun Muandingiana, Teikhang khua kiangah Rs 1,02,000 a coaching leh interview na ding leh a poimoh na a zatding a puaksuah ahihthu banah, Dingmuansanga, Kawlbem, X-Ray Technician sinding sponsor na in Rs 36000 leh Vungthanpuii, Mimbung, Lab-Technician sinlel sponsor na din Rs 36000 te hiae sinding a telkhiak ahihthu uh report leng pia hi.

Kum paisa 2019 leh 2020 hun ah Sinlai First Division a pass, sungkuan

khosak haksa mi 23 te kiang Rs 15000 chiat, a vek in Rs 3,20,000 SRDC in a piakkhati thu leng taklat ahi. Tulel in SRDC area huamsung a Siamsinna ding kidaihlouh na, sepsuah ahihtheih na ding in SRDC sum tungtawn in Sinsaktu mi 9 goih ahihthu leng taklang bok hi.

SRDC in Sinlai sponsor tu te leh a sungkuan te sik-le-tang in kipahthu gen banah hichi bang a panpihna a ngah uh thupi ahihdan banah theih tawp suah a zattak mi a suahsuak ngei a tup thu uh leng taklang uhi.

Hiae hun ah SSPP Headquarters, Aizawl makaite leh SRDC Hostel leh Education Committee member te banah mi poimoh tuamtuam ten leng huai hun uap uhi.

SELAM UNIT OFFICE BEARER KITELNA OM

Apaisa tarik 06/09/2021 in Siamsinpawlpi Headquarters Mizoram nuai a om SSPP Selam Unit Office Bearers ki telna neih a hi. Hiae a nuai a heutu muan mahmah te telching a hi uh hi.

SSPP SELAM UNIT OFFICE BEARERS: (2021-2022)

- ⇒ President : **Mr.T.Haumanlal** (*Ph.No.9863057731*)
- ⇒ Vice-President : **Mr.Lammalsom**
- ⇒ Secretary : **Miss.Vanlafel** (*Ph.No.9863654004*)
- ⇒ Asst. Secretary : **Miss.Manglallawm**
- ⇒ Treasurer : **Miss Lalrempuii**
- ⇒ Fin. Secretary : **Mr.Khawruatsang**

Siamsinpawlpi Activities:

**SIAMSINPAWLPI GENERAL HEADQUARTERS, LAMKA IN HON'BLE CM
BIREN SINGH KIANG AH MEMORUNDUM PIA.**

Tarik 6th September, 2021 ni in Tuibong, Peace Ground ah, "Go to Hills 2.0" program zatna hun lemtang a la in, President Pu Thanglalmuan Hauzel & General Secretary Pu Thangzamang Ngaihte-te' makaihna ah, General Headquarters Executive Committee-te'n, Manipur singtang mite hon sukha, ADC dissolved in toh kisai, ADC Bill 2021 leh HAC Member guanthak toh kisai, **memorandum** piakna kinei hi.

Hiai hun ah, Pu N.Biren Singh inle a kam(verbal) ah leng assurance hon pe ngal a, ngetna te a kinlam a suk vaiven sak ding atup ahihdan gen.

Tuni a memorandum kipia a tuangte:

1. ADC Fund Hill Areas a pai ding te, a pai nasan a zat ding;
2. ADC dissolution a open phot kiik ding;
3. ADC Bill 2021 Assembly a luikhiak a Act suahsak ding;
4. Phaizang MLA akipan HAC Member behlap a omte, India Constitution toh kituaklou a thusuah, anung a **kept in abeyance** kichipen huntawk-lou in, kintak a sukbei hi hen.

Hiai atung a point te ahi, SSPP in Government of Manipur kiang a ngetna kipa-ia ahi.

Siamsinpawlpi Residential School, Nghathal, Lamka
SCHOOL MANAGING COMMITTEE (2021 – 2023)

1. <i>Chairman</i>	N. Ginsianlal
2. <i>Vice Chairman</i>	Thangchinkhup Guite
3. <i>Secretary</i>	Lunminthang Samte
4. <i>Asst. Secretary</i>	G. Chinminthang
5. <i>Finance Secretary</i>	Kungbiaklian Khuptong
6. <i>Members:</i>	
	Guite Sumkhanmung;
	Thanglalmuan Hauzel;
	Benson Jamlianmang Guite;
	Tuankhansuan Gualnam;
	Nemy Lalnem Tombing;
	Ginmuhan Ngaihte;
	Nengzalian Tonsing;
	Thangzamang Ngaihte;
	Sum Paulson Khuptong;
	George Thangmuansang

Siamsin Pawlpi Activities:

SIAMSIN JOURNAL VOL 3 NO. 1 HONNA NEIH IN OM

Tarik nisim 16/08/21 (Seppatni) zingsang dak 7:30am in complex ah Pu Thanglalmuan President SSPP GHQ in **Siamsin Journal** Vol 3 No.1 honna nei hi. Hiae hun ah Htp Chinmuanthang Associate Editor, Siamsin Journal in hun makaih in, Htp Nengzalian Tonsing in Patna thumna leh hun honna nei in, tua zoh in President pu in I deihtoh SIAMSIN JOURNAL honna in zui ngal a, speech saulou hon gen zom hi. Huai zoh in Htp Siamgouthang Guite, Editor, Siamsin Journal in Journal vai toh kisai putlakna nei hi. Tua zoh in hun hon hia a, Htp Kham Guite, Htp Nengzalian Tonsing VP(Int) leh General Secretary Thangzamang Ngaihte te'n Journal toh kisai leh thu manpha taktak genna nei in, tua khit in Htp Thangzamang Ngaihte General Secretary SSPP GHQ in hun khakna nei in hun zoh ahi. Tuni a paikhawm te - Executive lam ah - Htp Thanglalmuan Hauzel President GHQ, Htp Nengzalian Tongsing VP GHQ(Int), Htp Thangzamang Ngaihte General Secretary GHQ, Htp Kham Guite leh Editorial Board lam ah Htp Siamgouthang, Htp Chinmuanthang, Htp Lunminthang, Htp Sangte Khuptong leh Htp Biak te hi uhi



Health Column:

VIRUS SHUT OUT @ COVID—19

Dr. Thongsuanmung Guite

- ⇒ Virus Shut Out in Covid natna dalthei, chi in hong kithang mahmah hi.
- ⇒ Tampite'n gingta in, hiai ok nak leh mask, SOP chihte zuih ngai non-lou, chi uhi.
- ⇒ Aman leng tam hetlou ₹ 250 – 500 kikal man hi.
- ⇒ A bawm ah 30 kigelh hi, huai tuh – I hon (open) ni apat a sim in, ni 30 sung phatuam. Covid apan hon veng thei hi, chih na ahi.
- ⇒ Japan a ki bawl ahi.

- ◆ Virus Shut Out sung ah damdoi “Chlorine Dioxide” kichi om hi.
- ◆ Chlorine Dioxide tuh damdoi inn sung, thil tung, room, vanzat tuamtuanme sterilize na di'n ki zang hi.
- ◆ Swimming pool, Tanky tui lak a natna hik-Bacteria, parasite leh virus khenhat thah na dia ki zang ahi.
- ◆ Natna leh virus khenhat thah-na ding in ki zang mah leh Chlorine Dioxide in Covid virus that thei ahi, chih scientific proved om nailou hi.
- ◆ That thei hita zenzen leh leng, a Card pen I ngawng a ki ok, I awm tan phasuk deldol hi. Virus honglut theihnate tuh I kam, mit leh nak ahi. Bang chi dan a hon veng tou thei mahmah ding maw?
- ◆ I gei ah mikhat hong khuh, hah



-thiai henla, a chiltui-naptui neng ki theh khe-te, hiai Card ngawng a I oh deldal maimai in bang chi dan a ana dal khe thei mahmah ding maw?
 ♦ Hiai Virus Shut Out apat gas hongpot khe-te in covid

Health Column: Virus shut out @ covid-19

vengthei chih ahi. Himahleh, huai gas hong pawttoute beipah, theng pah ahi. Adiak a, innkong ah huih lak ah theng pah, huih in tuah mangpah ding ahi.

- ◆ Huaiziak a, phatuam bang hi zenzen le zong, deih bang a hon vengzou tuanlou ding ahi, chih theih ding.
- ◆ Virus I chih tuh amah a hinna neilou ahi. Gentehna ding in: Thousi, thoukang matna dia kibolte'n ganhing hip (attract) uhi. A va boh chiang un ana hip in na that chetchet hi. Himahleh, virus I chih hinna neilou ahihman in, hiai Card I ok in Covid virus hip (attract) thei thahahlou ding ahi, chih theih ding ahi.
- ◆ Khovel ah, Chlorine Dioxide tuh khatvei mah leng, damdoi ding a ki zang ngei nailou himhim ahi, chih theih ding ahi.

CHLORINE DIOXIDE MIHINGTE A DING IN LAUH HUAI AHI.

Aziakte –

- * Vun: I vun kangsak thei hi.
- * Mit: I mit sip sak, chianglousak, nuamlousak thei hi.
- * Huih paina/Nakna lam: I nak, I gawlkhoi khathei hi.
- * Nek khak chiang in: Luaksuak,

lua, sungkhoh, chih te omsak thei hi.

Theih ding:

- * WHO/ICMR/India Govt. in zat recommend lou ahi.
- * USA, Vietnam, Thailand, Philippines chihte ah banned ahi.
- * US ah Georgia khomi hiai Card zuaktu khat mat ahi.
- * Gam tuamtuan a Virologist doctor te'n zatlouh ding chi uhi.

NGAIHTUAH THAM KHAT TUH:

- * Japan ah ki bawl himah leh, Japanese Consumer Affairs Agency te'n Covid a dia phattuamlou ahihdan gen khinta uhi.
- * Amau gam nasan in leng a reject uh, en Lamka khopi sung ah muang mahmeh a ok, chihdan bang leng omthei hi.
- * Sum dawnna hoihtak khat tuh hipeuh mah.

Huaiziak in, thu tuam la tuamtuan tampi om mah leh, mask leh SOP guideline te kan a hoih omnailou, chih theih hi.

.....

KIPAHPIHNA

MASTER DEGREE SANG TAKTAK IN ZOUKHIA UH

North Eastern Hills University (NEHU), Permanent Campus, Shillong in Master degree program tuamtuan result puankhiakna aneih na uah, I siamsinpih unau mi –4 in lohchinna sang taktak in hon zoukhia ua, a siamsinpih tamtakte' ading a etton huai leh suanhua mahmah ahihmanin, kipahpihthu i puang hi. Lohchinna ngah unaute ahihleh:

1) NGEMBIAKSANG d/o Pa K.

*Ginkhansuan,
Lawsohtun,
Shillong in MA
(Political Sci-
ence) Top—3
dinmun luah in
zoukhia hi.*



2) Library & Information Science (MLibs) Examination 2021 ah unaupa LIANGOUTAN VALTE

*s/o V Pum-
khogin, Pear-
son mun,
Lamka in
Top 1 (Gold
Medalist)
hihna la in
zoukhia hi.*



- 3) ANGELA CHINGNEIHOIH d/o S. Ginzalian Ngaihte, in Master of Arts (English) Examination 2021 result puankhiak a om ah **1st Class** in zoukhia hi.



- 4) MA Linguistics Examination 2021 ah i siamsinpih uh

- i) GINDEHKIM, Top 1 (Gold Medalist) leh



- ii) CIINMUANKIM, Top 6 dinmun luah in hon zoukhia uhi.

Hiae result suak ah siamsinmi lohchinna mu omkha tengteng leng kipahpihthu i puang ua, a mabaan uah ahong lohching touh ua hong lamzan touh zel diing uh leng deihsakna i khaak ahi.

.....

KIPAHPIHNA

NURSING OFFICER DING IN LOH-CHING

Siamsinpih **CHINGTHIANLUN** d/o *Thongkho thang Thangsing*, Lamlian Veng Bungmual in 2019 a, AIIMS Delhi in Common Recruitment Exam for RML, Lady Hardinge Medical College & Sajdarjung Hospital asai uh, tunai zek final result puankhiakna uah, "Nursing officer" ding in lohchinna hon muhna tung ah kipahpihnu i taklang hi.



Unn.Lulun in hun paisa inleng, AIIMS Delhi, AIIMS Bhopal leh DSSSB, Delhi ah Staff Nurse ana mukhin in, huai lak ah DSSSB nuai a sepna pen la in, tu in Baba Saheb Ambedkar Hospital, New Delhi ah semlel hi.

Lohchinna tam zaw ahonmuu zel a, maban a hong lamzan touhzel deihsakna sangtak i khak hi.

RBC BRANCH PRESIDENT IN KIPAHMAN SANG

SSPP Rayburn College (Degree) Branch a President **Unaupa VID-LUNMANG GUITE** s/o Hoihting, Siloam veng, Bungmual in One minute video competition of Voluntary Blood Donation kidemna District Aids Pre-



vention and Control Unit (DAPCU) Churachandpur te sai na ah winner hihna ana la hi. Htp. Vidlunmang Guite in kipahman in mobile handset (REDMI 9A) ana sang a ikipahpih petmah ahi.

PH.D HIHNA ANA NGAH HI Mizoram University in tarik August 13, 2021 ni a Notification asuahna ah unaupa **Mr. LALMUANA GUITE** in *Degree of Doctor of Philosophy (Ph.D)* zoukhia ahihna ana puangkhia hi. Supervisor Prof. J. K. Patnaik sinsak na nuai ah **Political Science** subject

ah *thesis – India-Sri Lanka Relations: A study of Ethnic Conflict and Cooperation* panson in Ph.D ana ngah hi. Unaupan Lalmuana Guite I kipahpih petmah ua, a maban ah leng hong lohchin touhzel I deihsakthu I khak ahi.



If undelivered, please return to

The Editor
Siamsin Journal
SSPP Complex, Siloam Veng
Bungmual, Lamka, Manipur, India - 795006
